

四庫全書

史部

欽定四庫全書

史部
隆平集卷二

詳校官編修_臣李潢

編修_臣裴謙履勘

總校官檢討_臣何思鈞

校對官編修_臣汪鏞

謄錄監生_臣張潯

欽定四庫全書

史部四

隆平集

別史類

提要

臣等謹案隆平集二十卷舊本題宋曾鞏撰
鞏字子固南豐人嘉祐二年進士調太平州
司法叅軍召為集賢校理出知福明諸州神
宗時官至中書舍人事蹟具宋史本傳是書
紀太祖至英宗五朝之事凡分目二十有六

體似會要又立傳二百八十四各以其官為類前有紹興十二年趙伯衛序其紀載簡畧瑣碎頗不合史法晁公武讀書志摘其記太平御覽與總類為兩書之誤疑其非鞏所作今考鞏本傳不載此集曾鞏作鞏行狀及韓維撰鞏神道碑臚述所著書甚備亦無此集據玉海元豐四年七月鞏充史館修撰十一月鞏上太祖總論不稱上意遂罷修五朝史

輦在史館首尾僅五月不容遽撰此本以進
其出於依托殆無疑義然自北宋之末已行
於世李燾作續通鑑長編如李至拜罷等事
間取其說則當時固存而不廢至元修宋史
表桷作搜訪遺書條例亦列及此書以為可
資援證蓋雖不出於輦要為宋人之舊笈故
今亦過而存之備一說焉乾隆四十六年九
月恭校上

總纂官臣紀昀臣陸錫熊臣孫士毅

總校官臣陸費墀

隆平集序

史官記錄其來尚矣雖六史異名職司殊事螭頭柱下
操觚載簡為記事之始蘭臺東觀稽文責實為勒撰之
所至於研精覃思提正得失權輿綱紀之論總括經緯
之條則必窮神於退食委蛇之間夙興夜寐之際故凡
為是官者莫不家有筆記自備討論豈不以事重體大
君子之所盡心焉哉厥自遷固各有家學楊子山為郡
上計猶獻哀牢傳得詔詣蘭臺迺若陸賈魚豢張璠范

睦亦復身非史職私撰國書由是言之一代成憲必資
草創於前博采羣言於衆廼能究當世之事備後王之
鑑故知為史之說皇朝太祖開運立極握符御天聖神
相繼緝熙文明之治亮采惠疇官得其人通籍史館尤
為慎選凡預論著皆命世大儒博學通識允所謂良史
之才者也南豐曾鞏子固為左史日嘗撰隆平集以進
自太祖至於英宗五朝聖君賢臣盛德大業文明憲度
更張治具之體文武廢置軍政大小之務郡縣戶口風

俗貢職之目柴燎祠祀學校科選之設宰相百官降王
外彞之事分門列傳凡一百六年為書二十卷當時號
為審訂頒付史館副存於家雖非正史亦草創注記之
流也世之學者前古之事靡不歷覽至於皇朝典故則
往往不知其源或年代差舛或名號錯誤事辭失據前
後牴牾蓋其所傳不審而外之故事雜錄各附間見國
史法禁世莫得聞每縉紳之士文涉典故則含毫猶豫
況於考著譜牒載述碑頌可使是非無準厚誣當時致

惑來世今斯集所載五朝之事炳然在目曾大父湍王
昔典宗正嘗授此書不敢顯祕庶幾宦學君子有所考
質嗚呼觀臯陶益稷之言知帝堯帝舜之事學者豈不
孜孜歟湍國趙伯衛序

欽定四庫全書

隆平集卷一

聖緒

宋 曾鞏 撰

聖宋趙姓帝高陽氏之後自漢京兆尹廣漢而下世居涿郡爰及唐季僖祖生焉燕薊之俗尚武時有僖祖以儒學顯終於縣令歷水清文安幽都三邑順祖即其子也少博學有時譽終於御史中丞翼祖即其子也少年

慷慨有大志歷營薊涿三郡宣祖即其子也雅尚儒素
又勇智過人仕周為將帥終贈太尉

太祖以宋州節度使為始封故國號大宋以火德王色尚赤
太祖啓運立極英武睿文神德聖功至明大孝皇帝宣
祖皇帝之第二子母曰昭憲皇太后杜氏初後唐明宗
即位每夕焚香禱天曰臣出戎狄世亂為衆所推願上
天早生聖人與中國為主天成二年二月十六日太祖
生周顯德七年正月三日統師北征劉筠次陳橋軍士

推戴勢不可避四日周帝遜位太祖登極以生辰為長
春節改元建隆追尊皇高祖府君謚文獻皇帝廟號僖
祖陵曰欽陵皇曾祖府君謚惠元皇帝廟號順祖陵曰
康陵皇祖府君謚簡恭皇帝廟號翼祖陵曰定陵皇考
府君謚昭武皇帝廟號宣祖陵曰安陵開寶九年十月
癸丑宮車晏駕在位十七年聖壽五十葬永昌陵孝明
皇后王氏孝章皇后宋氏

繼孝
明立

孝惠皇后賀氏

即位後
追冊

太宗至仁應道神功聖德文武睿烈大明廣孝皇帝宣

祖皇帝之第三子太祖同母弟晉天福四年十月七日
生顯德七年從太祖北征太祖既為諸軍擁戴師還太
宗叩馬首告曰諸軍將校若恃功肆行剽略使民肝腦
塗地非順天應人之意願誓而後進太祖遂誓於衆諸
將而下翕然稟命太祖嘉帝英略友愛益至傳位之意
始於此開寶九年十月癸丑即皇帝位是年改元太平
興國以生辰為乾明節淳化元年改曰壽寧節至道三
年三月癸巳宮車晏駕在位二十三年聖壽五十九葬

永熙陵明德皇后李氏

即位後立

淑德皇后尹氏懿德皇后

符氏

並即位後追冊

元德皇后李氏

真宗皇帝追尊

真宗膺符稽古神功讓德文明武定章聖元孝皇帝太

宗皇帝之第三子母曰元德皇后李氏生帝於開寶元

年十二月二日至道三年三月癸巳即皇帝位次年改

元咸平以生辰為承天節乾興元年二月戊午宮車晏

駕在位二十六年聖壽五十有五葬永定陵章穆皇后

郭氏

即位後冊

章獻明肅皇后劉氏

繼章穆立

章懷皇后潘氏

即位

冊後追

章懿皇后李氏章惠皇后楊氏

並仁宗皇帝追尊

仁宗體天法道極功全德神文聖武睿哲明孝皇帝真宗皇帝之第六子母曰章懿皇后李氏生帝於大中祥符三年四月十四日乾興元年二月戊午即皇帝位次年改元天聖以生辰為乾元節嘉祐八年三月辛未宮車晏駕在位四十二年聖壽五十有四葬永昭陵皇后

曹氏

即位後立

廢后郭氏溫成皇后張氏

貴妃追冊

英宗體乾膺歷隆功威德憲文肅武睿聖宣孝皇帝太

宗皇帝之曾孫濮安懿王第十三子母曰仙遊縣君任氏生帝於天聖十年正月三日嘉祐八年三月辛未即皇帝位次年改元治平以生辰為聖壽節治平四年正月丁巳宮車晏駕在位五年聖壽三十有六葬永厚陵

皇后高氏

即位後受冊

按此集真宗劉后俱作謚章獻李后俱作謚章懿新編劉謚全李謚莊懿通鑑二后俱作莊蓋舊制后謚必冠帝號真宗謚章聖故俱易為章

符應

竇儼周顯德中與楊徽之盧多遜同在諫垣常曰天地
厭亂久矣丁卯歲五星聚於奎自此太平矣恨不與二
拾遺同見之也乾德五年丁卯五星會於奎儼果已卒
師次陳橋軍中有苗訓者善占候引親吏楚昭輔視日
下復有一日

晉天福中兩浙民間語必以趙字為助如飲曰趙飲食
曰趙食之類宋興錢俶獨先恭順蓋悟此也

蜀自孟昶襲位民家質物者必書門曰召主收贖及昶

末年命翰林學士辛寅遜書桃板辭不工昶自題云新年納餘慶嘉節號長春及王全斌平蜀朝廷以叅知政事呂餘慶知成都府而長春節太祖生辰也

江南自晉漢以來民間服玩侈麗者或問之必曰此物屬趙寶子又李煜宮女染碧夜偶不收得雨色益鮮自爾競收雨水以染謂之天水碧天水趙姓郡號也

都城

東京城以宣武軍節度使治所建周世宗命韓通以近

甸丁夫增修太祖建隆三年命有司廣皇城東北隅按洛陽宮殿圖營繕太宗太平興國四年重立京城內外

門名二十有五

外城門南薰而次十七
內城門崇明而次八

西京古洛邑今與南北京竝為別都

南京景德三年升應天府建

北京慶歷二年升大名府建

官名

諸州置通判始於建隆四年命刑部郎中賈玘等充湖

南道諸州通判乾德四年詔自今事無巨細須長吏通判僉議連書僚屬方得奉行太宗朝以宗琪為開封府通判是後開封府不復置

司寇叅軍建隆間置以及第進士九經五經并在銓選人為之其後改曰司理五代時兩京軍巡諸州馬步院都虞候判官止以開封河南及諸州才校充選至是改馬步院為司寇而兩京軍巡始選任京官

轉運判官開寶六年廣南路初除徐澤一員太平興國

三年諸路並置

以武德使副為皇城以閑廐使副為崇儀太平興國中
改

文明殿學士太平興國五年因殿名置九年殿災改建
為文德殿此職遂廢

以補闕為司諫以拾遺為正言太平興國六年改

內殿崇班左右侍禁太平興國六年置以供奉官殿直
有四十年不得遷轉故增此三資崇班在供奉官之上

殿直在侍禁之下又改殿前承旨為三班奉職

以天廐使副為左右驂驥雍熙間改

宣政使淳化中置太宗曰宣徽使執政之漸非宦者所宜處以王繼恩平李順有功故特置此職授之

翰林侍讀學士咸平二年叅用舊制祿秩次翰林學士以侍讀授楊徽之夏侯嶠呂文仲以侍講授邢曷唐開元有侍讀其後有翰林侍讀學士至五代廢太宗始命呂文仲侍讀寓直禁中名秩尚卑故復更制

三司使咸平六年復後唐長興之制長興中張延朗領其使其後遂廢至是以寇準嘗執政故以為使兼總三部卞衮鹽鐵查道度支林特戶部竝副使又以判官六員外掌政令奏事又有更制使止書檢餘皆副使判官主之

資政殿學士景德二年因殿名置殿在龍圖閣之東序時王欽若求罷政事屢請不已特置此職以寵之殿學士在翰林學士之下侍讀之上是冬又加欽若大學士

之稱在翰林承旨之上

龍圖閣待制景德初閣成因置此職以授戚綸杜鎬大中祥符末又以馮元直龍圖閣待制直閣之名蓋始於此

提點刑獄景德四年置在轉運使副之下而俸給同每路二員內一員武臣帶同字天禧四年改曰勸農事至是提點刑獄亦兼

內殿承制大中祥符二年置在崇班之上

景德殿使大中祥符五年置以授內臣劉承規

發運都監天禧間置

天章閣待制天聖中置景祐間又添置待講

崇政殿說書景祐元年置以授賈昌朝

端明殿學士景祐初復後唐長興之制以殿為名置此

職

觀文殿大學士慶歷七年置時宰相賈昌朝求罷政事

除右僕射因以此職寵之仍詔自今曾任宰相者方除

紫宸殿學士慶歷八年因殿名置以授丁度是後不復置

官司

事材場建隆間內臣閻承翰以八作司出納積弊建議於都城西置場治此而後授之世以為便

綾錦院乾德五年置時已平蜀所得錦工六百人隸焉內藏庫太祖所置謂之景福內庫太宗新其名曰內藏自淳化至景德用兵及郊丘之費不取於民有司假內

藏緡帛六千餘萬每歲多或三百萬少亦不減百萬累年不能償詔即蠲除之真宗景德中命陳彭年作記以示宰臣曰此庫乃為計司備經費爾苟非節用能如是耶

以武德司為皇城司太平興國中改

封駁司太宗從魏羽請遵故事復置因命羽典領自唐以來凡制詔皆經東臺省審有未便者許封駁以聞主之者給事中也咸平四年改曰門下封駁事則給事中

之職

以匭院為登聞院太平興國六年改置咸平四年改登聞院曰登聞檢院改鼓司曰登聞鼓院自是匭函遂廢天聖間於登聞檢院鼓院各以匭函為檢匣凡言大事朝政闕失或訴冤未辨者悉令投檢匣以進即言涉竒邪無得通聞

以天廡為左右驕驥院雍熙初改

三班院雍熙四年置先供奉官以下隸宣徽院其員寢

多故別置官司考課而陞黜之

理欠司雍熙四年詔諸路州郡置

以軍頭司為殿前忠佐司端拱元年改

審刑院淳化二年於禁中置以李昌齡知院事凡具獄

案經大理寺刑部方關審刑中覆然後下相府相府又

以聞始論決

理檢司淳化三年詔於乾元門西北廊置復唐制也天

聖中遂置理檢使以御史中丞領之

審官院淳化四年改考課朝官院為之其幕職州縣官
止曰考課院

國信司景德元年因契丹修好始置止以內臣閭承翰
領其事

諫院明道初置

都水監嘉祐三年置

館閣

附 文籍

三館新修書院太平興國三年詔賜名崇文院唐武德

中初置修文館隸門下省貞觀中建史館於禁中專掌
國史開元五年於乾元殿東廊寫四部書置刊定官以
麗正殿為修書史十二年詔學士張說等晏於集仙殿
曰集賢即麗正殿也以修書史為集賢殿書院三館之
名蓋起於此自是集賢昭文置大學士史館置監修國
史皆以宰相兼領又置學士修撰直館校理之職以他
官領之昭文館隸門下省史館寓於集賢至梁遷都始
以今右長慶門東北小屋十數間為三館湫隘喧雜太

宗即位顧左右曰此豈所以待天下賢俊耶詔經度左
昇龍門東北車府為三館又敞園圃植花木引御溝水
注其中開便門西序備行幸盡遷文籍置焉東廊為昭
文書庫南廊為集賢書庫西廊分經史子集四部為史
館書庫初乾德中平蜀得書一萬三千卷開寶末平吳
又得二萬卷叅舊書為八萬卷

祕閣初隸京百司淳化元年祕書監李至等言藏書之
府漢麒麟天祿閣在未央宮中命劉向揚雄典校謂之

中書即內庫書也後漢東觀亦在禁中桓帝始置祕書
監掌圖書祕記謂之祕書魏分祕書為中書而祕書監
掌藝文圖籍後以祕書屬少府王肅為祕書監論不應
屬少府因是仍舊而蘭臺亦藏書故薛夏云蘭臺為外
臺祕書為內閣晉宋皆有祕書之號晉孝武好覽文藝
敕徐廣料祕書閣四部三萬卷宋謝靈運為監補祕閣
之遺逸齊末兵火經籍散亡隋煬帝寫祕閣二書分為
三品於觀文殿廊貯之唐開元中於乾元殿東廊寫四

庫書以充內庫命褚元量馬懷素總其事後以集仙殿
為集賢殿內置書院今陛下建祕書閣以藏奇書願頒
明詔俾與三館同列不隸京百司詔自今祕閣宜次三
館祕書省依舊屬京百司

唐會要百卷建隆二年宰相王溥進德宗時蘇冕撰四
十卷武宗時崔鉉又撰四十卷溥采宣宗以來故事廣
成百卷

開寶通義二百卷開寶四年學士李昉進唐開元中徐

金定四庫全書
卷一
堅蕭嵩等刪定古今五禮百五十卷昉等廣以成二百
卷開寶通義纂一百卷開寶六年叅知政事盧多遜進
太平總類太平御覽太平廣記皆太平興國中儒臣李
昉等編次

文苑英華一千卷雍熙三年學士宋白等奉詔以前世
文章纂成

道藏經大中祥符九年樞密使王欽若刪詳凡三洞四
部共四千三百五十九卷欽若言道德隆符乃老君聖

祖所述升於洞真部靈寶度人經之次又總為目錄表
求御製序詔從其請賜名曰寶文統錄欽若又言三洞
真經者無上大羅天中玉京元都祕藏之所蘊也元始
命天皇真人象形模寫名曰天書玉篆為文字之宗由
是經錄符圖諸天靈寶遞相祖述故道經為首焉洞真
經洞元經洞神經總百九十二萬四千三百八十卷祕
在玉京元都三十三天未盡降世間開闢後已降之經
一萬九千九百七十卷梁簡文帝時有六千餘卷唐明

皇所撰瓊網纔三千餘卷徐鉉等嘗校勘去其重複得三千七百三十七卷至欽若又增五百餘卷焉洞真洞元洞神謂之三洞太清太平太真正一謂之四部欽若又於道藏中檢閱神仙姓國姓者四千人事迹以聞詔圖形景靈宮廊廡

郡縣

建隆三年以青州北海縣為北海軍

建隆四年以秦州大潭縣治成紀開封府東明鎮為東

明縣義州山寨鎮為安化縣

義州太平興國初改為宜州

潭州弘道

縣為營道縣又以潭州江華縣隸道州

乾德二年以襄州陰成鎮為光化軍以襄州穀城鎮為乾德縣隸光化軍以朗州桃源鄉為桃源縣以揚州迎鑒鎮為建安軍割永正縣隸焉

乾德三年以溧州常豐場為常豐縣衡州安仁場為安仁縣江陵府白汭巡為潛江縣白日巡為建寧縣萬庚巡為萬庚縣白沙院為玉沙縣以北海軍為濰州割營

丘昌邑并北海縣隸焉

乾德四年以灌口鎮為永康軍割成都府導江縣蜀州

青城縣隸焉

乾德五年以成都府金水縣為懷安軍割漢州金堂縣

隸焉

開寶元年詔隴州置隴安縣

開寶二年以合州濃洄鎮為廣安軍

開寶三年以萬州梁山縣為梁山軍滄州無棣縣為保

順軍

開寶四年改密州輔唐縣曰安丘蜀州唐興縣曰江源
壽州盛唐縣曰六安同州奉仙縣曰蒲城廣南恩唐州
曰恩州明州曰南雄州又升揚州高郵縣為高郵軍

開寶五年以荊門鎮為荊門軍割荊南長林縣隸焉又
改邕州晉興縣曰樂昌利州益昌縣曰昭化趙州昭慶
縣曰隆平

開寶六年以雲安監為雲安軍

太平興國二年以李繼昇築潞州北亂柳石園中為威勝軍建鎮州成堡寨為平定軍曹州定陶鎮為廣濟軍改平南軍為太平軍以蕪湖繁昌縣隸焉

太平興國三年以廬州無為縣為無為軍以建州邵武縣為邵武軍

太平興國六年以定州保塞軍為保州易州太保寨為平寨軍梁門口寨為靜戎軍是年改靜戎曰靜安以霸州淤口為破虜軍改新鎮軍曰平戎

太平興國七年以江州星子縣為南康軍改關南曰高陽關

太平興國八年以海門鎮為太平軍以衢州開化場為開化縣

雍熙四年以廣德軍郎步鎮為建平縣

端拱元年以黎陽縣為通利軍以富國場為富國監

淳化元年以大庾縣置南安軍以大庾南安上猶三縣隸焉

淳化四年以耀州黎園鎮為淳化縣

淳化五年降成都府為益州以李順之亂故也以撫州
金谿場為金谿縣建州崇安場為崇安縣岳州王朝場
為平江縣信州寶豐場為寶豐縣汀州上杭場為上杭
縣武平場為武平縣仍舊隸逐州又以石保寨建威寨
軍席鷄城寨建清遠軍復為環州

至道三年建三泉縣為大安軍以西縣隸焉降天長軍
依舊為縣隸揚州以揚州六合縣隸建安軍築古原州

為鎮戎軍其謀出於節度李繼隆由蔚茹河路護靈州
軍糧因師進壁而還

咸平元年改太平軍為太平州

咸平三年以嵐州靜樂寨為靜樂軍

咸平四年以涇州長武鎮為長武縣仍隸涇州

咸平五年改靜樂軍為憲州以開封府通許鎮為咸平
縣

景德元年改威虜軍曰廣勝靜戎軍曰安肅破虜軍曰

信安平戎軍曰保定寧邊軍曰永寧定遠軍曰永靜定
羌軍曰保德平虜城曰肅寧

景德三年升應天府為南京以齊州章丘縣為清平軍
以洺州高苑縣為宣化軍以河南府永安鎮為永安縣
大中祥符二年改浚儀縣曰祥符升建安軍為真州

慶歷二年升大名府為北京

慶歷八年改貝州為恩州

學舍

五代學校不修學者多各從其師是以廬山有白鹿洞書院嵩陽嶽麓亦各有書院國朝各賜以書籍大中祥符初應天府民曹誠即戚同文舊學之地造書舍詔賜額曰應天府書院命戚綸之子舜賓主之其後庠序之教興而所謂書院者未之或聞矣

武學慶歷二年置於武成王廟

寺觀

建隆元年詔諸道寺院經顯德二年已廢者不得存留

其佛像許移置見存留處

開寶三年改封禪寺為開寶寺五年賜峨眉山新寺名

光相

太平興國二年改新造龍興寺為太平興國寺

同年
號

報

光寺為乾明

因乾
明節

三年改廬山東林為太平興國寺西

林為乾明寺通玄寺為太平觀九年置啓聖禪院即太

宗皇帝降誕之所

大中祥符間在京及仙源縣壽丘竝建景靈宮立聖祖

殿仙源縣壽丘建太極觀立聖祖母殿詔天下州軍監
置天慶觀仍竝建聖祖殿又改潤州京江中金山曰龍
遊禪院是山古謂之浮玉唐貞元二十一年江濱獲黃
金數鎰詔改為金山有頭陀自稱裴氏至山始創寺咸
通中曹確以山名寺偽唐李景保大間改寺名潭心云
治平三年詔一應無額寺院屋宇及三十間以上者竝
賜壽聖為額因壽聖節不及三十間者竝行拆毀

宮掖

建隆初後宮止及二百八十餘人開寶五年水災太祖
徧諭之曰願歸者以情言得五十餘人賜白金幃帳遣
之

太宗嘗謂侍臣曰晉武帝平吳之後後宮畜數千人朕
以此為戒宮中妃御掌事輩不過三百人猶以為多更
差擇之後雍丘尉武程上疏願減後宮嬪嬙上謂宰臣
曰內庭給使亦分掌事有不可去者爾朕固不作離宮
別館取良家子充其中如秦漢之君也李昉請加黜責

以懲妄言上曰朕曷嘗以言罪人但念程不能知爾
真宗即位擇宮中給事歲深者出之景德元年又令籍
宮中止留年高者餘悉放出皆號泣願留上敦諭令中
使訪良族聘之宰臣李沆曰此盛德之事也大中祥符
元年又遣出百人謂近臣曰亦節用之一端也

仁宗寶元二年放宮人二百七人諭輔臣曰不獨矜其
幽閉亦省掖廷費也

英宗治平元年放宮人一百三十五人又明年放一百

八十人宮人及戚里有留內寺觀為尼女冠不出者上
一日謂宰臣曰欲聽從人可乎韓琦等對曰陛下哀憐
及此誠仁政之一端也遂聽其從便

隆平集卷一